


SEPHIRI SA MODIMO

KUTOLLO 10:7



LENANEO LA MATENG

Lenaneo La Mateng

- 
- 2 Sa Ka Godimo Ga Tlhago
 - 8 Kahlolo
 - 12 Leineng
 - 16 Bophelo Ka Morago
 - 22 Sebe Sa Setlogo
 - 28 Letšatši Le Le Šiišago
La Morena
 - 34 Lentšu

www.molaetsa.net
goba

VOICE OF GOD RECORDINGS
SOUTH AFRICA OFFICE

58 DISA ROAD, ADMIRAL'S PARK, GORDON'S BAY 7140
WESTERN CAPE REPUBLIC OF SOUTH AFRICA

A MODIMO O SA DIRA MEDIRO YE
MAATLA GO SWANA LE GE A DIRILE
KA BEIBELENG?

A O KILE WA IPOTŠIŠA KA BOWENA
GORE KE KA LEBAKA LA ENG O HLOKA
GORE O KOLOBETŠWE?

GO NO RE O LELOKO LA KEREKE, A SEO
SE RA GORE O PHOLOŠITŠWE?

GABOTSE GO DIREGILE ENG MAGARENG
GA SERPENTE LE EFA KA TŠHEMONG YA
EDENE?

A O BE O TSEBA GORE BEIBELE E A
TSHEPHIŠA GORE SEPHIRI SA MODIMO
SE TLA PHETHEGA MO MATŠATŠING A A
MAFELELO?

KE NAKO YA GORE DIPHIRI DI NOTLOLLWE
GOMME DI UTOLLELWE LEFASE.
**A O A RATA GO KWA LENTŠU LA
THEREŠO LA MODIMO?**

Eupša ka matšatšing a morongwa wa bošupa, ge a
tla thoma go letša, **sephiri** sa Modimo se tla be se
phethagetše, bjalo ka ge a boditše baporofeta bahlanka
ba gagwe.

KUTOLLO 10:7

Sa Ka Godimo Ga Tlhago

JOHANE 14:12

RURI, RURI, KE RE GO LENA, YO
A DUMELAGO GO NNA, MEDIRO
YE KE E DIRAGO O TLA E DIRA LE
YENA; GOMME O TLA DIRA MEDIRO
YE MEGOLO GO FETA YE; KA BAKA
LA GORE KE YA GO TATE.

MAREKA 16:17-18

GOMME MASWAO A A TLA LATELA BONA BA BA DUMELAGO; KA
LEINA LA KA BA TLA LELEKELA BODIABOLO NTLE; BA TLA BOLELA
KA MALEME A MASWA;

BA TLA TŠEELA DISERPENTE GODIMO; GOMME GE BA KA NWA SELO
SEFE GOBA SEFE SE SE BOLAYAGO, SE KA SE BA GOBATŠE; BA TLA BEA
DIATLA GODIMO GA BALWETŠI, GOMME BA TLA FOLA.

Ka moka ga rena re phetla matlakala a Beibele gomme
re a bona gore Modimo o dira mehlolo: Moshe o ile a
fatola Lewatle le Lehucedu, Eliya o ile a bitša tlala, Jesu
o ile a sepela godimo ga meetse, gomme barutiwa ba ile
ba fodiša balwetši.

Go na le ditiragalo tše dikete tša mehlolo tše di
ngwadilwego ka Beibeleng. Ge Modimo a bea bohlatse
ka maswao le dimaka, gona e kae mehlolo ya Gagwe
lehono? Naa A ka kgona go fodiša kankere go swana le
ka fao A fodišitšego lephera ka Beibeleng? Go reng ka
AIDS goba malaria? A O sa kgona go dira mohlolo? Eye,
Modimo o sa dira mehlolo gomme maswao a a latela
bona ba ba dumelago.

Bjale, lebelelang bagwera, gopolang ka Kgoši
George wa Engelane, ge a ile a fodišwa a na le
thatafalo ya dithišu tša mmele ye ntšhi, ge re ile
ra mo rapelela. Gopolang ka Florence Nightingale,
(makgolvagwe, ke mothomi wa Sefapano se
Sehubedu), o be a le boima bjo e ka bago diponto
tše masometshela, a robaditšwe kua a ehwa ka
kankere godimo ga lelalegolo la mogodu, a robetše
kua a ehwa. Leeba le lennyane le ile la fofela ka
sethokgweng kua gomme Moya wa Modimo
wa tla gomme wa re, "GO RIALO MORENA, o
tla phela." Gomme o imela diponto tše lekgolo le
masometlhano-tlhano ka pholo ye e phethagetšego.

Gopolang ka Molekgotla Upshaw a dutše a
tlemeletšwe ka ditulong le mpeteng ngwaga ka
morago ga ngwaga, mengwaga ye masometshela-
tshela. Gomme thwi ka lebakanyana la nako a
emelela ka maoto a gagwe, a kitima go kgabola
moago, a kgwatha menwana ya gagwe ya maoto, a
dirwa wa go felela le go fola ka go phethagala.

E nong go gopola ka batho ba dikete le dikete ba
ba fodišitšwego. Ke ka lebaka la eng re dutše fa go
fihla re ehwa? A re direng se sengwe ka yona.

Eba le tumelo ge o babja goba o na le tlhokego. Beibele
e bolela gore Jesu Kriste o a swana maabane, le lehono,
le ka gosafelego, ka fao ge A be a kgona go dira mohlolo
mengwaga ye dikete tše pedi ya go feta, gona O sa kgona
go dira ka mo go swanago lehono. O re tshephišitše gore
re fodišitšwe, ge feela re ka dumela.

William D. Upshaw

o šomile mengwaga ye
seswai ka Ngakong
wa Baemedi wa United
States gomme e bile
mophenkijšanelā
boporisitente ka 1932.

Kotsi ya temo e mo
golofaditše e sa le
ngwana, gomme a fetša
mengwaga ye 66 a le
godirno ga dikota goba
setulong sa mabili. Ka
1951, o ile a fodišwa ka go
felela gomme a sepela ka
go phethagala bophelo bja
gagwe ka moka.




Florence Nightingale.

Ieloko la kgole la mooki
wa go tsebega, o be a na
le kankere ya mogodu ya
makgaolakgang. O ile a
romela senepe se bjalo ka
kgopelo ya thapelo pele
ga ge kankere mafelelong
e be e ka tšeа bophelo
bja gagwe. Bjalo ka ge
le ka kgona go bona, o
be a le nthianeng ya lehu
pele Morena Jesu a mo
fodiša ka 1950. Senepe
se se latelago se tserwe
ka morago ga phodišo ya
gagwe gomme sa romelwa
ka gare bjalo ka bopaki bja
gore Modimo o sa fodiša
balwetši.



Tris

Griffin o ile ofising ya ngaka mathomong a 2013 ka lebaka la bohloko bja mokokotlo gore
o be a boifa gore e be e ka ba go tšwelela gape ga ntwa ya gagwe le kankere. MRI e ile ya laetša
"go arogana ga tšhikakgolo" ka pelong ya gagwe, seo se ile sa dira gore dingaka di dire diteko
tše di tseneletšego gomme ba beakanyetša opharešene ya tšhoganetšo letšatši le le latelago.
Mothaladi go kgabola pelo mo seswantšong ke go palega mo go lego molaleng go rago gore la ka
bjako le gona la ka pela lehu ge e ka phatloga.



Letšatši le le latelago, ka morago ga ge badumedi ba mo rapeletše, dingaka tša sekena se sengwe gape sa CT go šupa lefelo la go palega pele ga ophareišene. Ka ye nako, seswantšho sa laetša pelo ya go fola ka go felela. Ka go makala, ngaka a botša Mdi. Griffin, "Ga ke tsebe gore nka go botša eng. O be o na le go hloka karolo ga tšhikakgolo, eupša bjale bohlatse ka moka bo sepetše." O ile a mo laetša diswantšho pele ga thapelo, gomme le ka morago. "O lokologile go ka sepela, gomme gape, ga go na le gape le ge e le leswao la kankere. O ka pholong ye e phethagetšego."



(la nngele) Mosebe wa ngaka o šupile tšhikakgolo, ye e lego ye ntsho, lefelo la ntikudiku bogareng bja seswantšho. Mothaladi wa go putla ke go ruruga ga leboto la tšhika, goba "go arogana" ga tšhikakgolo, yeo e bego e nyaka ophareišene ya ka pela gomme ke ye šoro ge e ka phatloga. (ka godimo) Sekene sa bobedi se tšerwe letšatši le le latelago. Go arogana go timeletše ka go felela gomme ga se gwa hlwe go bowa.

Methopo

PSALME 103:2-3

Reta MORENA, O soulo ya ka, gomme o se lebale ka moka tša go hola tša gagwe; Yo a go lebalelago makgopo a gago ka moka; yo a fodisago malwetsi a gago ka moka;

JESAYA 53:5

Eupša o hlabilwe ka baka la dikarogo tša rena, o tlapiroigantšwe ka baka la makgopo a rena: kotlo ya khutšo ya rena e be e le godimo ga gagwe; gomme ka megogoma ya gagwe re fodile.

MAREKA 16:17

Gomme maswao a a tla latela bona ba ba dumelago; Ka Leina la ka ba tla lelekela bodiabolo ntle; ba tla bolela ka maleme a maswa;

LUKA 17:6

Gomme Morena a re, Ge le na le tumelo ya go lekana le thorwana ya peu ya masetate, le ka re go sehlare se sa mosekamoro, Tomogela godimo ka modu, gomme o itlhome ka lewatleng; se tla le obamela.

JOHANE 14:12

Ruri, ruri, Ke re go lena, Yo a dumelago go nna, mediro ye Ke e dirago o tla e dira le yena; le ye megologolo mediro ye e fetago ye o tla e dira; ka baka la gore Ke ya go Tate wa ka.

I BATHESALONIKA 1:5

Ka fao ebangedi ya rena ga se ya tla go lena ka lentšu feela, eupša gape le ka maatla, le ka Moya wo Mokgethwa, le ka netefatšo ye ntsho; bjalo ka ge le tseba gore re be re le banna ba mohuta mang magareng ga lena ka baka la lena.

BAHEBERU 2:3-4

Re tla phonyokga bjang, ge re nyatša pholosha ye kgolo ye; yeo la pele e thomilego go bolelwa ke Morena, gomme ya tle ya tiisetšwa mo go rena ke bao ba mo kwelego; Modimo le yena a ba hlatsela, ka maswao le ka dimaka, le ka mehlolo ya mehutahuta, le dimpho tša Moya wo Mokgethwa, go ya ka thato ya gagwe mong?

BAHEBERU 13:8

jesu Kriste wa go swana maabane, le lehono, le ka go sa felego.

JAKOBO 5:5

Gomme thapelo ya tumelo e tla pholosha molwetsi, gomme Morena o tla mo tsošetša godimo; gomme ge a dirile dibe, o tla di lebalelwa.

I PETRO 2:24

Yo yena mong ka boyena a rwelego dibe tša rena ka mmele wa gagwe mong godimo ga mohlare, gore rena, ba re hwilego ka thokong ya sebe, re phelele go loka: ka yoo re fodisitšwego ka megogoma ya gagwe.

PSALME 96:13

PELE GA MORENA: KA GORE
 O A TLA, KA GORE O A TLA GO
 AHLOLA LEFASE: O TLA AHLOLA
 LEFASE KA TOKO, GOMME BATHO
 KA THEREŠO YA GAGWE.

Fao go na le dikete tša dikereke tša maina tša go fapana lefaseng lehono. Bodumedi bjo bongwe le bjo bongwe bo ahlola bjo bongwe, go le bjalo ka moka ba tshephiša phološo ka kereke ya *bona* ya leina. Re tseba bjang gore re kgetha efe?

Ge re kgetha kereke ya Katoliki, gona re amogela go *go emelwa ke bakgethwa*, yeo e sa fetego go rapela diswantšho. Beibele e re, “*Ka gore fao go na le Modimo yo motee, gomme mmoelanyi yo motee magareng ga Modimo le batho, ke motho Kriste Jesu;*” (I Tim 2:5). Moprista o bitšwa “Tate” seo se ileditšwego ke Jesu ka go Mateo 23:9: “*Gomme le seke la bitša monna tatago lena mo lefaseng: ka gore Tatago lena ke yo motee, yo a lego legodimong.*” Maassemblies Of God



ba a re botša gore go bolela ka maleme ke bohlatse bja mathomo bja Moya wo Mokgethwa, ge Paulo a rile, “*Le ge nka bolela ka maleme a batho le a barongwa, gomme ka hloka lerato, ke tla go ba mphiri wo o llago, goba moropa wo o dumago.*” (I Bak 13:1)

Gabotse ka moka dikereke tša maina di phakiša go re botša gore dilo tše ntšhi ka Beibeleng ga di hlalošwe ka maleba, di lahlegile tlhatholong, goba ga di re lefase la lehono. Ka fao, a re swanetše go dumela Beibele goba dithuto tša kereke tša maina? Na Modimo o tla šomiša eng bjalo ka seelo sa kahlolo?

*Ge ke be nka botšiša Katoliki fa bošegong bjo,
 “Ke eng se le gopolago gore Modimo o tla ahlola
 lefase ka sona?” Katoliki e re, “Ka Kereke ya
 Katoliki.” Tšohle gabotse, bjale Kereke ya Katoliki
 efe? Bjale ba na le ya Roma, Greek Orthodox,
 le tše ntšhi tša tšona. E tla ba Kereke ya Katoliki
 efe? Maluther ba re, “Ka rena,” gona lena
 Mabaptist le ka ntle. Gomme ge re ka re, “Ka
 Baptist,” gona lena Mapentecost le ka ntle. Ka
 fao go be go tla ba le tlhakahlakano ye bjalo, ga
 go le yo motee yo a be a tla tseba gore a dire eng;
 ka fao Ga se ake a tshephiša go ahlola lefase ka
 kereke.*

*O tshephišitše go ahlola lefase ka Kriste, gomme
 Kriste ke Lentšu. Gomme Beibele ke yona e tla
 ahlolago lefase, e lego Jesu Kriste yo a swanago
 maabane, lehono, le ka gosafelego.*

Methopo

JOHANE 1:1

Mathomong go be go le Lentšu, gomme Lentšu o be a le go Modimo, gomme Lentšu e be e le Modimo.

JOHANE 1:14

Gomme Lentšu la dirwa nama, gomme la aga magareng ga rena (gomme ra bogela letago la gagwe, letago la motswalwanoši wa Tate,) mottala kgaugelo le therešo.

JOHANE 5:22

Ka gore Tate ga a ahlole motho, eupša o neetše kahlolo ka moka go Morwa:

JOHANE 12:48

Yo a nkaganago, gomme a sa amogele mantšu a ka, o na le yo a mo ahlolago: lentšu le Ke le boletšego, ke lona le tla mo ahlolago ka letšatši la mafélelo.

BAEFESO 1:5-7

O re kgethetše ka peong ya bana ka Jesu Kriste ka go yena, go ya ka kgahlego botse ya thato ya gagwe,

Gore go retwe letago la kgaugelo ya gagwe, yeo a re dirilego gore re amogelege ka go morategi.

Go yo re hweditšego topollo ka go yena ka madi a gagwe, tebalelo ya dibe, go ya ka mahumo a kgaugelo ya gagwe;

BAEFESO 2:5-8

Le mola re sa hwetše dibeng, o re tsošitše mmogo le Kriste, (le phološitše ka kgaogelos)

Gomme o re tsošitše mmogo, gomme a re dira gore re duele mmogo go mafelo a tša magodimo ka go Kriste Jesu:

Gore mabakeng a a tlago a bonagatše mahumo a gagwe a magologolo a kgaugelo ya gagwe ka botho bja gagwe go rena ka Kriste Jesu.

Ka gore ka kgaugelo le a phološwa ka tumelo; gomme e sego ka bolena: ke mpho ya Modimo:

I JOHANE 1:7

*Eupša ge re sepela seetšeng, bjalo ka ge a le seetšeng, re na le kopanelo mongwe le yo mongwe,
gomme madi a Jesu Kriste Morwa wa gagwe a re hlatswa dibe tšohle.*

KUTOLLO 22:18-19

*Ka fao Ke pakela motho yo mongwe le yo mongwe yo a kwago mantšu a seporofeto sa puku ye, Ge
motho mang kapa mang a ka oketša dilo tše, Modimo o tla mo okeletša dikotlo tše di ngwadilwego
ka pukung ye:*

*Gomme ge motho mang kapa mang a ka fokotša go mantšu a puku ya seporofeto se, Modimo o tla
tše go tloša karolo ya gagwe go tšwa pukung ya bophelo, le go tšwa toropongkgolo ye kgethwa, le go
tšwa go dilo tše di ngwadilwego ka pukung ye.*



MAREKA 16:16

*YO A DUMELAGO GOMME A
 KOLOBETŠWA O TLA PHOLOŠWA;
 EUPŠA YO A SA DUMELEGO O TLO
 AHLOLWA.*


DITIRO 2:38

KA GONA PETRO A RE GO BONA, SOKOLOGANG, GOMME LE
 KOLOBETŠWENG YO MONGWE LE YO MONGWE LEINENG LA JESU
 KRISTE TEBALELONG YA DIBE, GOMME LE TLA AMOGELA NEO YA
 MOYA WO MOKGETHWA.

Go molaleng, kolobetšo e bohlokwa kudu, eupša a go a
 tshwenya ka mokgwa wo re kolobetšwago? A fao go na
 le kolobetšo ye e nepagetšego, goba se sengwe le se
 sengwe se ka šoma? Ge o dumela Beibele, gona EYE, fao
 go na le kolobetšo ye e nepagetšego.

Dikereke tše ntšintšintši di kolobetša Leineng la Tate,
 Morwa, le Moya wo Mokgethwa, eupša ye ga se ya
 nepagala go ya ka Beibele.

Ka go Ditiro 19, fao go be go na le batho ba bangwe bao
 ba bego ba šetše ba dumetše go Jesu Kriste, eupša ba se
 ba amogela Moya wo Mokgethwa ka dipelong tša bona.
 Moapostola Paulo o be a tseba tsela ya go nepagala ya
 go amogela Moya wo Mokgethwa, ka fao a ba botšiša,
 "Le kolobeditšwe ka efe?" Gomme ba re, "Ka kolobetšo
 ya Johane." (Ditiro 19:3) Paulo a bona gore ba be ba se ba
 kolobetšwa go ya ka taelo ya Petro ka go Ditiro 2:38, ka
 fao a ba laela gore ba kolobetšwe gape Leineng la Morena
 Jesu. Ka gona, bjalo ka ge go tshephišitšwe, ba amogela
 Moya wo Mokgethwa.





Ka fao, ke ka lebaka la eng barutiwa ba kolobeditše Leineng la Jesu ge Jesu, ka Boyena, a ba boditše gore ba ba kolobetše **Leineng** (e sego “maineng”) la Tate, le la Morwa, le la Moya wo Mokgethwa? (Mat 28:19) A ba dirile phošo? Aowa! Ba dirile tlwa go ya ka fao ba laetšwego.

Ge o bala sengwalwa se, nagana ka leina la gago. A ke wena morwa? A leina la gago ke, “Morwa”? A ke wena mme? A leina la gago ke, “Mme”? Ka nnete aowa, tšeо e no ba dithaetlele tše bonolo. O na le leina la mmakgonthe, gomme ka fao le Modimo o nalo.

Karabo še:

*Gomme fao ga go na le selo se
sebjalo ka Beibeleng bjalo ka yo mongwe a kilego
a kolobetšwa leineng la Tate, Morwa, Moya wo
Mokgethwa; ka gore ga go na le selo se se bjalo.
Tate ga se leina; gomme Morwa ga se leina; gomme
Moya wo Mokgethwa ga se leina; eupša Leina la
Tate, Morwa, Moya wo Mokgethwa ke Morena Jesu
Kriste.*

Jesu Kriste ke Modimo! Ke Tate, Morwa, le Moya wo Mokgethwa.

Ge o nyaka Moya wo Mokgethwa gomme o makala gore ke ka lebaka la eng Morena a se a go fa wona le bjale, gona o ka nyaka go ipotšiša ka bowena potšišo ye e swanago yeo Paulo a go e botšiša, “Le kolobeditše ka efe gona?”

Methopo

MATEO 28:19

Ka gona e yang, gomme le rute ditšaba ka moka, ka go ba kolobetša leineng la Tate, le la Morwa, le la Moya wo Mokgethwa: [Na Leina la Tate ke mang? Leina la Morwa? Leina la Moya wo Mokgethwa?]

MAREKA 16:16

Yo a dumelago gomme a kolobetšwa o tla phološwa; eupša yo a sa dumelego o tla ahlolwa.

JOHANE 5:43

Ke tlide leineng la Tate wa ka, gomme ga le nkamogele: ge yo mongwe a etla leineng la gagwe mong yena le tla mo amogela. [Ge A etla Leineng la Tate wa Gagwe, gona Leina la Gagwe ke mang?]

JOHANE 10:30

Nna le Tate wa ka re batee.

JOHANE 12:45

Gomme yo a bonago nna o bona yo a nthomilego.

JOHANE 14:8-9

Filipi a re go yena, Morena, re laetše Tate, gona go tla re kgotsafatša. Jesu a re go yena, A Ke bile le lena nako ye telele ka mokgwa wo, gomme ga se wa be wa ntseba, Filipi? yo a bonego nna o bone Tate; gomme o bolela bjang gona ge o re, Re laetše Tate?

JOHANE 20:27-28

Gomme a re go Thomase, Tliša monwana wa gago fa, gomme o bone diatla tša ka; gomme tliša seatla sa gago fa, o se fakele ka lehlakoring la ka: gomme o se ke wa ba mohlokatumelo, eupša o dumele. Gomme Thomasa a fetola gomme a re go yena, Morena wa ka le Modimo wa ka.

DITIRO 2:38-39

Gomme Petro a re go bona, Sokologang, gomme le kolobetšwe yo mongwe le yo mongwe wa lena leineng la Jesu Kriste tebalelong ya dibe, gomme tla amogela neo ya Moya wo Mokgethwa. Ka gore tshephišo ke ya lena, le ya bana ba lena, le ba ba lego kgole, ba bantši ba Morena Modimo wa rena a tlago go ba bitša.

DITIRO 4:12

Ga go pholosho go yo mongwe: ka gore ga go leina le lengwe ka fase ga legodimo le lefiliwgo magareng ga batho, leo ka lona re swanetšego go pholosha.

DITIRO 8:12

Eupša ge ba dumetše Filipi a rera dilo mabapi le mmušo wa Modimo, le leineng la Jesu Kriste, ba ile ba kolobetšwa, mmogo banna le basadi.

DITIRO 19:3-6

Gomme a re go bona, Le kolobeditše ka efe? Gomme ba re, Ka kolobetšo ya Johane. Ka gona Paulo a re, Johane ka nnete o kolobeditše ka kolobetšo ya tshokologo, a botša batho, gore ba dumele go yo a tlago go tla ka morago ga gagwe, ke gore, go Jesu Kriste. Gomme ge ba ekwa se, ba kolobetšwa leineng la Morena Jesu.

Gomme ge Paulo a beile diatla godimo ga bona, Moya wo Mokgethwa wa tla godimo ga bona; gomme ba bolela ka maleme, gomme ba porofeta.

BAEFESO 4:5

Morena ke o tee, tumelo ke e tee, kolobetšo ke e tee,

BAKOLOSE 3:17

Gomme tšohle le ka di dirago ka lentšu goba ka diatla, di direng ka moka leineng la Morena Jesu, le leboge Modimo le Tate ka yena.

I JOHANE 5:7

Ka gore go na le ba bararo ba fago bohlatsse legodimong, Tate, Lentšu, le Moya wo Mokgethwa: gomme ba bararo ba ke o tee.

BOPHELO KA MORAGO

Bophelo Ka Morago

JOHANE 5:28-29

LE SEKE LA TLABEGA KA SE: KA
GORE GO TLA IRI, YEO KA MOKA BA
BA LEGO MABITLENG BA TLAGO GO
KWA LENTŠU LA GAGWE,
GOMME BA TLA TSOGA; BA BA
DIRILEGO GO LOKA, BA TLA
TSOGELA BOPHELONG; GOMME
BA BA DIRILEGO BOBE, BA TLA
TSOGELA GO AHLOLWA.

Go tla letšatši mo e lego gore yo mongwe le yo mongwe wa rena, e le Mokriste goba ka mokgwa wo mongwe, a tlagu go hwetša tlwa gore go eng ka kua ga garetene ya nako. Beibele e tshephiša Bophelo bjo Bosafelego go ba ba ba itšego, gomme go ba bangwe, e tshephiša kahlolo. Motho yo mongwe le yo mongwe go kgabaganya histori ka nnate o ile a ipotšiša ka boyena, "Go tla direga eng go nna ge ke ehwa?"

Kgale pele fao go e ba Beibele go bala, moporofeta Jobo o ile a bogela tlhago. O boletše ka khlofelo ya mohlare, ka fao o ka ripelwago fase gomme wa hwa, eupša ka monkgo wa meetse, o tabogela morago bophelong gomme wa bea dithaka tše mpsha. Jobo o be a

tseba gore motho, go swana le mohlare, o tla tsogela gape bophelong:

Ge motho a ehwa, a a ka phela gape? ka moka matšatši a nako ye ke e beetšwego ke tla leta, go fihla phetogo ya ka e etla.

O tla bitša, gomme ke tla go araba: o tla ba le tumo go mošomo wa diatla tša gago.

Ka gore bjale o bala dikgato tša ka: a ga se wa hlokomela godimo ga sebe sa ka? (Jobo 14:14-16)

Jobo a ka no ba a be a se na le Beibele gore a bale, eupša o be a tseba gore Modimo letšatši le lengwe o be a tla mo tsoša go tšwa lebitleng ge Molopolodi wa batho a be a etla pele.

Oo mantšu a ka bjale nka be a ngwalwa! oo nkabe a gatišitšwe ka pukung!

O ka re nkabe a tlokwa ka pene tshipi le morodi letlapeng go ya go ile.

Ka gore ke a tseba gore molopolodi wa ka o a phela, gomme le gore o tla ema ka letšatšing la morago godimo ga lefase:

*Gomme le ge ka morago ga ge diboko tša letlalo la ka di senya mmele wo, **go le bjalo nameng ya ka ke tla bona Modimo:** (Jobo 19:23-26)*

Moporofeta o be a bolela ka Morena Jesu le tsogo ya batho ba Gagwe. Ka kutollo Jobo o tsebile gore le ge mebele ya rena e ka omelela go tloga ka go felela, Jesu o tla bušetša nama ya rena. Gomme ka mahlo a rena

beng, re tla bona go Tla ga Gagwe. Ka moka batho ba Modimo ba hlologela go bona letšatši leo la letago.

Go le bjalo, ka nnete feela bjalo ka ge Modimo a le gona, fao go na le gape diabolo; gomme ka nnete feela bjalo ka ge go na le Legodimo, fao gape go na le hele. Diporeisi tša phinkgišano di godimodimo go feta ka fao re kgonago go eleletša. Moapostola Paulo o boletše gore, "Leihlo ga se la ke la bona, le tsebe ga ya kwa, le bile ga se tšake tša tsena ka pelong ya motho, dilo tše Modimo a di lokišeditšego ba ba mo ratago." (I Bak. 2:9)

Megopolو ya rena ga e kgone go eleletša ka fao Legodimo e tla bago le legolo ka gona, ebile ga e kgone go eleletša go šiiša ga hele. Jesu o re boditše gore hele ke ye mpe kudu mo e lego gore go be go ka ba kaonekaone ge re ripa go tloša setho sa mmele wa rena go na le gore re be kotsing ya go ya lefelong lela la go šiiša.

Gomme ge seatla sa gago se go kgopiša, se ripe go se tloša: go kaonekaone go wena go tsena bophelong o le segole, go na le gore o be le diatla tše pedi o ye ka heleng, ka mollong wo o ka se tsogego o timilwe:

(Mareka 9:43)

Ka fao ke mang a tlago go ya Legodimong? Gomme ke mang yo a tlago go ya heleng? Ke mogopolo wa go nyamiša, eupša Jesu o boletše gore batho ba bantšintshi ba ka seke ba amogela moputso wo A ratago go o fa: *Tsenang ka gare ka kgoro ye e pitlaganego: ka gore kgoro e ahlame, gomme tsela ke petleke, yeo e išago tshenyegong, gomme ba bantši fao ke ba ba yago kua ka yona: Ka baka la gore kgoro e pitlagane, gomme tsela ke ye tshesane, ye e išago ka*

bophelong, gomme ba ba sego nene fao ke bao ba e hwetšago. (Mat 7:13-14)

Jesu gape o rile, " *Ga se mang le mang yo a rego go nna, Morena, Morena, a tlago go tsena ka mmušong wa legodimo;* ge e se yo a dirago thato ya Tate wa ka yo a lego legodimong. Ba bantšhi ba tla re go nna ka letšatši leo, Morena, Morena, a ga ra ka ra porofeta ka leina la gago? gomme ka leina la gago ra rakela bodiabolo ntle? gomme ka leina la gago ra dira mediro ye mentšhi ya go makatša? Gomme ka gona Ke tla bolela le bona, Nna ga se ka ke ka le tseba: tlogang go nna, lena ba le dirago bokgopo." (Mat 7:21-23)

Go no re ka baka la gore motho a tleleima Bokriste ga go re gore motho yoo o phološitšve. Ka fao, ye ke potšišo ya molaleng ka megopolong ya rena: Na ke amogela bjang Bophelo bjo Bosafelego? Jesu o re file karabo ye bonolo kudu: *Ruri, ruri, Ke re go lena, Yo a kwago lentšu la ka, gomme a dumela yo a nthomilego, o na le bophelo bjo bosafelego, gomme a ka seke a tla ka kahlolong; eupša o fetile go tšwa lehung go ya bophelong.* (Johane 5:24)

Ka go hloka mahlatse, fao go na le batho ba ba sego nene lefaseng lehono ba ba ratago go tšwa go matšatši a bona a lepotlapotla go kwa Lentšu la Modimo. Gomme go na le ba ba tlogago ba se nenenene ba ba tlago go dumela Lentšu ge gatee ba le kwele.

Dikereke di re botša gore re be motho wa go loka, re nagane ka maleba, re seke ra bolela maaka, re seke ra radia, goba go utswa, gomme re tla ya Legodimong. Ga di kwišiše gore hele e tla be e tletše batho ba ba bonalago ba phela maphelo a go loka. Nnete ke gore

ga re ye Legodimong ka baka la ditiro tša toko tša rena goba ka baka la gore re leloko la kereke ye e itšego. Fao go na le tsela e tee feela go ya Bophelong bjo Bosafelego, gomme yeo ke ka Jesu Kriste. O re laetše gore re swanetše go DUMELA Lentšu la Gagwe, e lego Beibele. Go sego bjalo, re be re ka phološwa bjang?

Ge letšatši la kahlolo le le tlela, a le tla kwa, "Etlang, lena bašegofatšwa ba Tate wa ka, tšeang bjalo ka bohwa mmušo wo o lokišeditšwego lena go tloga go theweng ga lefase," (Mat 25:34) goba a le tla kwa, "Tlogang go nna, lena barogwa, le yeng mollong wo o sa felego, o lokišeditšwego diabolo le barongwa ba gagwe"? (Mat 25:41)

Ge mahlo a gago a bala go putlaganya mantšu a, o na le kgetho ye o swanetšego go e dira: A o ka kgetha go dumela Lentšu la Modimo?

O ya go jela kae bokagosafelego?

Methopo

JOBO 14:12-16

Ka fao motho o robala fase, gomme ga a tsoge: go fihla magodimo a se sa le gona, ba ka seke ba tsoga, goba ba tsöswa go tšwa borokong bja bona.
O a mola nna nkabe o nkuta ka lebitleng, mola nkabe o mpoloka sephiring, go fihla bogale bja gago bo feta, gora o mpeetše nako, gomme o tla nkopola!
Ge motho a ehwa, a ka phela gape? ka moka matšatši a nako ye ke e beetšwego ke tla leta, go fihla phetogo ya ka e etla.
O tla bitša, gomme ke tla go arabu: o tla ba le tumo go mošomo wa diatla tša gago.
Ka gore bjale o bala dikgato tšaka: a ga se wa hlombokela godimo ga sebe sa ka?

JOBO 19:23-26

Oo o ka re mantšu a ka bjale nkabe a ngwalwa! oo nkabe a gatišitšwe ka pukung!
O ka re nkabe a tlakwa ka pene tshipi le morodi lettlapeng go ya go ile!
Ka gore ke tseba gore molopolodi wa ka o a phela, gomme le gore o tla ema ka letšatšing la morago godimo ga lefase:
Gomme le ge ka morago ga ge diboko tša lettalo la ka di senya mimele wo, go le bjalo nameng ya ka ke tla bona Modimo.

MATEO 7:21-23

Ga se yo mongwe le yo mongwe yo a rego go nna, Morena, Morena, a tloga go tsena ka mmušong wa legodimo; ge ese yo a dirago thato ya Tate wa ka yo a lego legodimong.
Ba bantši ba tla re go nna ka letšatši leo, Morena, Morena, a ga ra ka ra porofeta ka leina la gago? gomme ka leina la gago ra rakela bodiabolo ntle? gomme ka leina la gago ra dira mediro ye mentshi ya go makatša?
Gomme ka gona Ke tla bolela le bona, Nna ga se kake ka le tseba: tlogang go nna, lena badiri ba bokgopo.

MATEO 22:14

Ka gore ba bantši ba beditšwe, eupša ba ba kgethilwego ga ba nene.

JOHANE 3:16-17

Ka gore Modimo o ratille lefase ga kaakang, a be a neela Morwa wa gagwe a tswetšwego a mnoši, gore mang le mang a tla dumelago go yena a seke a lahlega, eupša a be le bophelo bjo bosafelego.
Ka gore Modimo ga se a romela Morwa wa gagwe lefaseng gore a ahlole lefase; eupša gore lefase le phološwe ka yena.

JOHANE 5:24

Ruri, ruri, Ke re go lema, Yo a kwago lentšu la ka, gomme a dumela yo a nthomilego, o na le bophelo bjo bo sa felego, gomme a ka seke a tla ka kahlolong; eupša o fetile go tšwa lehung go ya bophelong.

I BAKORINTE 2:9

Eupša go ngwadilwe, Leihlo ga se la ke la bona, le tsebe ga ya kwa, ebile ga se tša ke tša tsena pelong ya motho, dilo tše Modimo a di lokišeditšego bona ba ba mo ratago.

I BATHASALONIKA 4:13-18

Eupša ga ke rate ge le hloka tsebo, baena, mabapi le ba ba ithobaletšego, gore le seke la hlokofala, bjalo ka ba bangwe ba ba hlokago kholofelo.
Ka gore ge re dumela gore Jesu o hwile gomme a tsoga gape, ge go le bjalo le ba ba robetšego go Jesu Modimo o tla ba tliša le yena.
Ka gore se re le botša sona ka lentšu la Morena, gore rena ba re phelago gomme ra šadišetšwa go tla ga Morena re ka se ka ra raka bao pele ba robetšego.
Ka gore Morena ka boyena o tla fologa legodimo ka kgowa, ka lentšu la morongwamogolo, le ka phalafala ya Modimo: gomme ba ba hwetségo go Kriste ba tla tsoga pele:
Ka gona rena ba re šetšego re phela re tla tšeelwa godimo mmogo le bona ka marung, go gahlanetša Morena moyeng: ya tlo ba go ba le Morena go ya go ile.
Ka gona homotšanang ka mantšu a.

Sebe Sa Setlogo

GENESI 3:1

BJALE SERPENTE E BE E HLAFILE
KUDU GO FETA PHOOFOLO EFE
KAPA EFE YA NAGA YE MORENA
MODIMO A E DIRILEGO. GOMME
A RE GO MOSADI, YA, A MODIMO
O RILE, LE SEKE LA JA SEHLARE SE
SENGWE LE SE SENGWE SA TŠHEMO?

GENESI 3:6-7

GOMME GE MOSADI A BONA GORE SEHLARE E BE E LE SE SEBOTSE
GO BA SEJO, GOMME SE KGAHLIŠA MAHLONG, GOMME SEHLARE SA
GO DUMEGA GO DIRA YO MONGWE A HLALEFE, A TŠEA KENYWA
YA SONA, GOMME A JA, GOMME GAPE A FA LE MONNA WA GAGWE A
NAGO NAYE; GOMME A JA.

GOMME MAHLO A BONA MMOGO A BULEGA, GOMME BA TSEBA GORE
BA BE BA PONOKA; GOMME BA ROKAGANYA MATLAKALA A MOGO
MMOGO, GOMME BA ITIRELA DITHETHWANE KA BOBONA.

GENESI 3:14-15

GOMME MORENA MODIMO A RE GO SERPENTE, KA BAKA LA GORE O
DIRILE SE, O ROGAKILWE GO MOHLAPE KA MOKA, LE KA GODIMO GA
PHOOFOLO YE NNGWE LE YE NNGWE YA NAGA; O TLA SEPела KA MPA
YA GAGO, GOMME O TLA JA LEROLE MATŠATŠI KA MOKA A BOPHELO
BJA GAGO:

GOMME KE TLA BEA BONABA GARE GA GAGO LE MOSADI, LE GARE GA
PEU YA GAGO LE PEU YA GAGWE; E TLA GO PŠATLA HLOGO, GOMME
WENA O TLA E LOMA SERETHE SA GAGWE.

Se ke sebe sa mathomo se se ngwadilwego ka Beibeleng. Ya go hlalefa kudukudukudu magareng ga diphoofolo, serpente, e "radietše" Efa ka go jeng seripana sa kenywa ye e ileditšwego. O ile a e ja gomme ka gona a e fa le monna wa gagwe, gomme ya ba dira gore ba lemoge gore ba be ba ponoka.

Dipotšišo tša molaleng ke: Noga e ka kgona bjang go bolela? Na apola e dira eng le go ba mapona? Gomme, peu ya serpente e tsena kae ka go ka moka tše?

Beibele e re serpente e be e le ya go "hlalefa" kudukudukudu go diphoofolo ka moka. O be a swana le motho, gore a be a kgone go sepela, go bolela, gomme a be a be le bohlale bja poledišano. Ka morago ga go radiela mosadi wa Adama, Modimo o ile a mo rogaka gomme ya ba noga, eupša e sego pele tshenyo e dirilwe gomme peu e bjetšwe.

Beibele e bolela ka go Genesi 3:15 gore serpente e bile le peu, gomme Modimo o beile *bonaba* magareng ga dipeu tše pedi. Go molaleng, peu ya



serpente e ile ya hlakana le peu ya tlhago ya Efa pele ga karogano. Go be go ka kgonega bjang gore ka moka tše e be dipolo tša go ja apola? Ka gona, ditemana di sego kae ka morago, "Adama o ile a bitša leina la mosadi wa gagwe gore ke Efa; ka baka la gore e be e le mmago diphedi ka moka." Ela hloko gore ga e re Adama e be e le tatago diphedi ka moka.

Fao go na le "dikenywa" tša go fapano ka Beibeleng. Ka nnete, fao go na le kenywa ya nnete, bjalo ka apola, yeo e melago gomme e lewa bjalo ka sejo. Fao gape go na le kenywa ye e rago mediro ya rena, gore ke mediro ya tlhago go swana le bolemi le kgwebo, goba ke mediro ya semoya bjalo ka go dira mehlolo le go rera Ebangedi. Gona, fao go na le kenywa ya popelo, e rago go ima le tswalo ya ngwana.

A go ja kenywa ya nnete go ka fa Adama le Efa kwišišo ya gore ba be ba ponoka? Goba, go tšea kamano ya senama magareng ga monna le mosadi go kwišiša gore ke ka lebaka la eng ba swanetše go khupetša ditho tše di itšego tša mebele ya bona?

Gabotse go diregile eng letšatši lela ka Tšhemong seo se dirilego gore bomotho ka moka bo we?

*Bjalo ka ge Peu ya mosadi e bile go ikatiša
ga Modimo ka Boyena ga mmakgonthe ka
nameng ya motho, ka fao peu ya serpente
ke tsela ya mmakgonthe yeo Sathane a
hweditšego gore o be a kgona go ipulela lemati
ka boyena go tsena ka lelokong la batho. Go
be go sa kgonege go Sathane (ka gore o no*

*ba sebopiwa sa moyo se se HLOTŠWEGO)
ikatiša ka boyena ka mokgwa wo Modimo a
ikatišitšego ka Boyena, ka fao bohlatsa bja
Genesi bo re botša ka fao a tšweleditšego peu
ya gagwe gomme a itsebiša goba a itlhabella
ka boyena ka lelokong la batho. Gape elelwang
gore Sathane o bitšwa "serpente." Ke peu ya
gagwe goba go itlhabella ka lelokong la batho re
bolelago ka gona.*

*Pele ga ge Adama a be a ka ba le tsebo ya
senama go Efa, serpente o ile a ba le tsebo
yeo pele ga gagwe. Gomme yo motee yo a
tswetšwego ke yona e bile Kaine. Kaine e be e
le wa (o tswetšwe ke, ke wa yo) yola yo "Mobe
yo Motee," I JOHANE 3:12.*

*...Therešo ya taba ke gore Efa o bile le barwa
ba BABEDI ka popelong ya gagwe (mafahla)
go tšwa go dikemišo tša go AROGANA. O be
a rwele mafahla, ka kamaro ya Kaine nako ye e
itšego pele ga yela ya Abele.*

Methopo

GENESI 3:6-7

Gomme ge mosadi a bona gore sehlare e be e le se sebotse go ba seja, gomme gore se be se kgahliša mahlong, gomme sehlare sa go dumega go dira yo mongwe a hlalefe, a tše kenywa ya sona, gomme a ja, gomme gape a fa le monna wa gagwe a mago naye; gomme a ja.

Gomme mahlo a bona mmogo a bulega, **gomme ba tseba gore ba be ba ponoka**; gomme ba rokaganya matlakala a mogo mmogo, gomme ba itirela dithethwana ka bobona.

[Ba be ba ka tseba bjang gore ba be ba ponoka go tšwa go jeng seripana sa kenywa?]

GENESI 3:13-15

Gomme MORENA Modimo a re go mosadi, Ke eng se o se dirilego? Gomme mosadi a re, **Serpente o nthadiile**, gomme ka ja.

Gomme MORENA Modimo a re go serpente, Ka baka la gore o dirile se, o rogakilwe godimo ga mohlape ka moka, le ka godimo ga phoofolo ye nngwe le ye nngwe ya naga; o tla sepela ka mpa ya gago, gomme o tla ja lerole matšatši ka moka a bophelo bja gago:

Gomme ke tla bea **bonaba gare ga gago le mosadi**, le gare ga peu ya gago le peu ya gagwe; e tla go pšhatla hlogo, gomme wena o tla loma serethe sa gagwe.

[Serpente e bile le peu. Go molaleng, gore se ga se re noga.]

GENESI 3:20

Gomme Adama o ile a bitša leina la mosadi wa gagwe gore ke Efa; ka baka **la gore e be e le mmago diphedi ka moka**.

[Ke ka lebaka la eng Adama a sa bitšwe tatago diphedi ka moka?]

GENESI 4:1-2

Gomme Adama a tseba Efa mosadi wa gagwe; gomme a ima, gomme a belega Kaine, gomme a re, **ke hweditše monna go tšwa go MORENA**.

Gomme gape a belega ngwanabó Abele. Gomme Abele e be e le morui wa dinku, eupša Kaine e be e le molemi wa mobu.

[Ka moka bophelo bo tšwa go Modimo, goba bo imilwe ka semolao goba ka ntle ga molao. Sathane ga a kgone go hlola bophelo.]

LUKA 3:8

E be e le morwa wa Enose, yo e bego e le morwa wa **Sethe**, yo e bego e le morwa wa **Adama**, yo e bego e le morwa wa **Modimo**.

[O kae Kaine leitšibolo ka lelokong la Adama?]

I JOHANE 3:12

E sega bjalo ka **Kaine**, yo e bego e le morwa wa **yo mobe**, gomme o bolaile ngwanabó. Gomme o mmolaetše eng?

Ka baka la gore mediro ya gagwe e be e le ye mebe, gomme ya ngwanabó e be e le ya go loka.

[Modimo o hlotše Adama ka seswantšho sa Gagwe mong. Na bobe bja Kaine bo tšwa kae, gomme toko ya Abele etšwa kae? Maabela a bona ba a tšere go tšwa go bo tatago bona.]

JUDA 1:14

Gomme Henoge le yena, **monna wa bošupa go tšwa go Adama**, o ile a porofeta ka tše, a re,

Bonang, Morena o a tla le bakgethwa ba gagwe ba dikete tše lesome,

[Ga go gona ka Beibeleng fao Kaine a lego ka lelokong la Adama.]



LETŠATŠI LE LE ŠIIŠAGO LA MORENA

MALEAKI 4:1

KA FAO, BONANG, LETŠATŠI LE A TLA,
LE LE FIŠAGO BJALO KA OBENE...


MALEAKI 4:5-6

BONANG, KE TLA LE ROMELA ELIYA MOPOROFETA PELE GA GO TLA
GA LETŠATŠI LE LEGOLO LE LE ŠIIŠAGO LA MORENA:

GOMME O TLA BUŠETŠA PELO TŠA BOTATE GO BANA, GOMME PELO
TŠA BANA GO BOTATAGO BONA, GORE KE SEKE KA TLA GOMME KA
OTLA LEFASE KA THOGAKO.

Puku ya mafelelo ya Testamente ye Tala e tshephiša go senywa ga lefase. Eupša pele ga bofelo, Eliya moporofeta o bolellwa pele go bowa gape go tsebiša Mesia. Ba bangwe ba re Johane Mokolobetši o phethagaditše seporofeto se.

Dikete tše pedi tša mengwaga tša go feta, Bajuta ba be ba letile Mesia gore a tle. Ba be ba tseba gore Maleaki o ile a porofeta monna ka moywa Eliya yo a bego a tla tsebiša Mesia go bona. Eupša ge Johane Mokolobetši ge a tlide, o be a se se ba bego ba letetše Eliya go ba sona. Ge ba be ba botbiša Jesu ka gore ke ka lebaka la eng Eliya a se a tla pele, O ile a ba botša ka go hlathologa gore Johane o be a le phethagalo ya seporofeto seo. *"Gomme ge le ka e amogela, yo ke Eliase, wo a bego a swanetše go tla."* (Eliase ke mokgwa wa Segerika wa leina la Seheberu, Eliya.)



E bile feela seholpha se sennyane sa batho se sa go amogela kutollo ye. Go baetapele ba bantšintšintši ba bodumedi, Johane o be a sa fete moswaswalatši wa mafolofolo a godimo wa mekgatlo ya bona. E sego feela gore ga se ba ke ba lemoga moya wa Eliya, eupša sa go befa, ba phošitše Go tla ga Kriste.

Ka fao na Johane Mokolobetši o phethagaditše seporofeto sa Maleaki? E sego ka go felela.

Pele ga tšohle, lefase ga se la “swa bjalo ka obene” le bjale, ka fao re a tseba gore bonnyane karolo ya Maleaki 4 e sa tlide go direga. Karolo ye nngwe ya Lengwalo yeo e sego ya be ya phethagatšwa ke Johane e bile, “go bušetša pelo tša bana go botatago bona.” Gomme, Jesu, ka Boyena, o porofetile gore Eliya o tla (ka moso) tla gomme a bušetša dilo ka moka. (Mat 17:11)

Ka fao re swanetše go ba re lebeletše Eliya pele ga go Tla la Bobedi ga Kriste!

Bjale, letšatši le la sebjalebjale, ke nako ya go Tla la Bobedi ga Morena Jesu. Gape, re a tshephišwa gore moya wa Eliya o tla Mo tsebiša go rena go ya ka Maleaki 4. Eupša ke seholpha sefe sa batho se se tlago go lemoga Eliya ge a etla? Ke feela bao ba mo lebeletšego.

Mantšu a a Morena le Mophološi wa rena a tla mogopolong ge re gopola ka seporofeto sa Maleaki mo diiring tše tša go tswalela ga nako:

Eupša Ke botša lena, Gore Eliase o šetše a tlide, gomme ga se ba ke ba mo tseba...

Mateo 17:12



Go ka reng ge e ba re phošitše go tla ga Eliya?
A gona re tla phoša go Tla la Bobedi ga Kriste,
go swana le ka fao ba mangwalo le Baifarasei
ba phošitšego go Tla ga Gagwe ga pele ka
baka la gore ba se ba ke ba lemoga Johane
Mokolobetši?



Methopo

II DIKGOSI 2:15

Gomme ge barwa ba baporofeta bao ba bego ba swanetše go bona godimo ga Jeriko ba mmona, ba rile, **moya wa Eliya o khutšitše godimo ga Elisa**. Gomme ba tla go mo gahlanetša, gomme ba ikinamišetša fase pele ga gagwe ka bobona.

JESAYA 40:3-4

Lentšu la yo a goelelago lešokeng. Lokišang lena tsela ya MORENA, dirang go otlolla ka leganateng tselalephejo ya Modimo wa rena.

Moedi wo mongwe le wo mongwe o tla phagamiswa, gomme thaba ye nngwe le ye nngwe le mmoto di tla kokobetšwa: mo go kgopamilego go tla otollwa, gomme mo go lego makukuno go tla latšwa: [Johane Mokolobetši]

MALEAKI 3:1

Bonang, Ke tla romela motseta wa ka [Johane Mokolobetši], gomme o **tla lokiša tsela pele ga ka**: gomme Morena, yo le mo nyakago, ka pele o tla tla tempeleng ye ya gagwe, yena motseta wa kgwerano, yo le mo thabelago: bonang, o tla tla, go rialo MORENA wa mašaba.

MALEAKI 4:1-6

Ka fao, **bonang, letšatši le etla, leo le tlago go fiša bjalo ka obene** [ga se la be la direga le bjale]; gomme baikgantši ka moka, ya, le ka moka ba ba dirago bobe, ba tla ba makobe; gomme letšatši leo le tlago le tla ba tšumha, go rialo MORENA wa mašaba, gore le se ba šadiše modu le ge e le lekala.

Eupša ge e le lena ba le boifago leina la ka le tla hlabelwa ke Letšatši la toko la phodišo diphegong tša lona; gomme le tla ya pele, gomme le golela godimo bjalo ka mamane a lešaka.

Gomme le tla gatakela fase ba babe; ka gore ba tla ba melora ka fase ga disola tša maota a lena ka letšatši leo ke tlago go dira se, go rialo MORENA wa mašaba.

Gopolang lena molao wa Moshe mohlanka wa ka, wo Ke mo laetšago wona Horebe o ela Israele ka moka, e le ditaelo le dikahlolo.

Bonang, Ke tla le romela Eliya moporofeta pele ga go tla ga letšatši le legolo le le šiišago la MORENA:

Gomme o tla bušetša pelo tša botate go bana [Johane Mokolobetši], **le pelo tša bana go botatago bana** [Eliya wa sebjalebjale], gore Ke seke ka tla gomme ka otla lefase ka thogako.

MATEO 11:10

Ka gore yo ke yena, yo go ngwadilwego ka yena, Bonang, Ke romela motseta wa ka pele ga sefahlego sa gago, yo a tlago go lokiša tsela pele ya gago. [Maleaki 3:1, Johane Mokolobetši]

MATEO 11:14

Gomme ge le ka e amogela, yo ke Eliase, wo a bego a swanetše go tla. [Johane Mokolobetši]

MATEO 17:11-12

Gomme Jesu a araba a re go bona, **Eliase ka mnete ke wa go tla pele, le go bušetša dilo ka moka.** [Eliya wa sebjalebjale]

Eupša Ke botša lena, Gore Eliase o šetše a tlie, gomme ga se ba ke ba mo tseba, eupša ba mo dirile tše ba di ngwadilego. Ka wona mokgwa woo Morwa motho o tla tlašega ka tšona. [Johane Mokolobetši]

LUKA 1:17

Gomme o tla moeta pele ka moyo le ka maatla a Eliase, gomme o tla bušetša dipelo tša botate go bana, le baganetši go bohlale bja baloki; e be go lokišetša Morena batho ba ba mo letetšego. [Johane Mokolobetši]

Lentšu

BAHEBERU 4:12

KA GORE LENTŠU LA MODIMO
LE A PHELA, GOMME LE NA LE
MAATLA, GOMME LE BOGALE GO
FETA TŠHOŠA YE NNGWE LE YE
NNGWE YA MAGALEMABEDI, LE
A PHULELETŠA LE GO AROGANYA
SOULO LE MOYA, LE MALOKOLLO
LE MOKO, GOMME KE MOFENYEKI
WA DIKGOPOLO LE MAIKEMIŠETŠO
A PELO.

Ka dithuto tše ntši ka mokgwa wo, dikereke tša maina, le ditumelokarogi ka lefaseng le la sebjalebjale, na modumedi wa therešo o lekana kae? Ge Petro, Jakobo, le Johane ba be ba le mo lefaseng lehono, ke efe kereke ya leina ye ba bego ba ka e tšoena? A mehlolo e be e tla be e sa latela bodiredi bja bona goba ba be ba tla bolela gore matšatši ao a fetile kgale? A ba be ba ka khompromesa ka kolobetšo? A ba be ba ka latela thuto ya kereke ya bona le ge e be e tšwele Lentšung gannyane? A ba be ba ka dumela Beibele, goba ba be ba ka dumela Bafarasei le Basadusei ba lehono?

Ipotšiše ka bowena potšišo ye: Ge Jesu Kriste a be a ka be a le fa lehono, a o be o ka tlogela tšohle go Mo latela? A o be o ka dumela Lentšu la Gagwe?

O go file sebakabotse se se swanago se A go se fa barutiwa ba Gagwe. O beile thereke ye ka seatleng sa gago go go šupetša morago go Lentšu la Gagwe, Beibele ya Gagwe. A o ka khompromesa?

*Banna le basadi, bagwera, a le a lemoga
gore Modimo wa Legodimo yo a
tsošitšego Kriste Jesu bahung, ga se A
hwa eupša O a phela. Gomme ge A ile a
boloka Lentšu la Gagwe go Dafida, ge A
ile a le boloka go Eliya, ge A ile a le boloka
go Moshe, ge A ile a le boloka go bana
ba Baheberu, ge a ile a le boloka go-go
Daniele, O tla le boloka go wena le nna.*



A O NYAKA GO TSEBA GO FETIŠA?

www.molaetsa.net

goba

**VOICE OF GOD RECORDINGS
SOUTH AFRICA OFFICE**

58 DISA ROAD, ADMIRAL'S PARK, GORDON'S BAY 7140
WESTERN CAPE, REPUBLIC OF SOUTH AFRICA



SEPHIRI SA MODIMO

KUTOLLO 10:7

www.molaetsa.net

VOICE OF GOD RECORDINGS
SOUTH AFRICA OFFICE

58 DISA ROAD, ADMIRAL'S PARK, GORDON'S BAY 7140
WESTERN CAPE REPUBLIC OF SOUTH AFRICA
NORTH SOTHO